

Bulh Ta 'Udustl'us John 'Uk'eyánguz-i

John, Gaius ts'iyanne yuk'entsi'-un, 'en yuts'ó k'e'anguz

¹Si John 'utso whudilhduh-un Gaius ts'iyanne yuk'entsi'-un, 'en soo 'alha ook'esi'-un, 'en oots'ó k'e'usges.

²Ook'esi'-un nzul dáldzoo' la whuz un'a ts'iyaitsuk be hoonzoo 'oneh 'ink'ez soo 'ónt'e', 'et whuz un'a mba tenadusdli.

³Daint'en la ts'ih'un un'a inyalh-un, neyulhutsinke whusahándil 'ink'ez ndi khuni 'alha' 'unt'oh-i bulh 'int'oh-i, 'et hukw'ún nahuwulnuk. 'Et huwa tube cho hoonúst'i'.

⁴Suzkehke unline, 'enne khuni 'alha' 'unt'oh-i be ts'ih'un un'a hidulh-un whulh 'údusts'o te, 'et dáhoolcho-i be hoonúst'i' whe' hoont'oh.

Gaius 'ahoolhiz ts'iyanne bula 'ut'en

⁵Ook'esi'-un neyulhutsinke 'ink'ez 'uts'un whut'enne 'ahoolhiz bula 'int'en.

⁶'Enne 'uhint'oh nts'en'a la buk'entsi', Yak'usda ba 'ilhunaoodulhne, 'enne buts'un nk'unahuwhulnuk. Nts'en'a la Yak'usda hootát'e' hukw'un'a hutidulh ts'e whébilh'aih de, 'et tube soo 'int'en whe 'int'en.

⁷Yak'usda boozi' gha whehándil 'ink'ez 'udun yun k'ut whut'enne bula k'ez lhe'hílhchulh 'et huwa.

⁸Wheni cha ndunt'ohne neyoh dábut's'oooleh huba' hoont'oh. 'Et de la khuni 'alha' 'unt'oh-i ba 'ilhoh 'uts'ut'en ts'ooole' la.

**'Ilhohun dune, 'en hoont'i' whe Yak'usda ba
'ilhunaoodúlhne butoh dune 'unt'oh-un na'dudil'i, 'ink'ez
'ilhohun dune, 'en ts'iyanne soo híghu yalhduk**

⁹'Et Yak'usda ba 'ilhunaoodúlhne buts'ó k'e'isguz. 'Et hoont's'i 'ilhohun butoh usda-un, Diotrephe's huyulhni, 'en hoont'i' whe buba nus diziti' na'dudil'i, 'et hukwa' ninzun. 'En 'aw nekalhe'nízun.

¹⁰ 'En khuni ook'ewhúnduda 'i be 'ants'i ulgih le'utni nech'az yálhduk. 'Et huwa nohts'u tísyalh de, nts'oh te ne'ut'en-un nohnalh howu yatisduk. 'Aw 'et za iloh ndut'en, neulhutsinke 'aw buka lhe'nízun. 'Ink'ez mbene la buka' ninzunne, 'enne tenazdudli bayoh 'et tenábulh'aih.

¹¹ Ook'esi'-un ndai la ntsi'-i buné'nont'en junih. Unzoo-i za buné'nont'en. Mbe la 'ut'en unzoo-i 'ulh'en-un, 'en Yak'usda bulh 'unt'oh. 'Et hoonts'i mbe la tank'us 'ut'en-un, 'en 'aw Yak'usda lhí'el whe 'unt'oh.

¹² Ts'iyanne Demetrius soo híghu yalhduk. 'Ink'ez khuni 'alha' 'unt'oh-i, 'i gha whunéulhtun dant'oh unli. 'Ink'ez wheni cha soo óoghuh yats'ulhduk. 'Ink'ez 'alha' ts'utni t'eeonáhzun.

Ts'iyanne budzi whudoghel-un, 'et buts'u hukwa' ninzun

¹³ Lhat-un huwun 'uk'uné'tisguz inle'. 'Et hoonts'i 'aw 'udustl'us k'ut 'ink'ez 'udustl'us too be iloh.

¹⁴⁻¹⁵ 'Et hoonts'i 'a cho, nyutis'elh hukwa tse hóosdli. 'Ink'ez soo lhuníl'en whe yatálduk. Ts'ih'un un'a lhts'un 'óoht'e'. Nek'ekene nezih dilhts'ine, 'enne hadih nyuhútni. Nek'ekene nyuzih dilhts'ine, 'enne 'ilhoghun hinli hadih ubudíni.